

Den caso Avestruz

Fiscal a exigi 4 año di prison pa Susebeek, 3 año pa Arends, 2 año pa Nuñez, Werleman, Mansur y 6 luna pa Abath

ORANJESTAD (AAN): Diahuebs mainta Fiscal a baha pisa den caso Avestruz. Fiscal a bisa cu e caso aki mester ta un señal bon cla pa TUR cu ta traha den Gobierno pa no haci corrupcion. Corupcion ta castigabel pa ley. E sospechosonan: Biemans, Harms, Every, Nuñez, Werleman, Mansur, Susebeek, Abath, Richardson tabata presente den sala di Corte pascucha e exigencia di Fiscal. Arends y Winterdaal no tabata presente.

SEVINGER A LAGA AMIGONAN BIRA MAS RICO


Fiscal a bisa cu e caso Avestruz ta muestra cu un minister, Sevinger, a laga su amigonan bira mas rico. A duna privilegio na algun cu a gana miyones. Esaki no ta algo cu sosode solamente na Aruba sino henter Antiyas Hulandes. Tin sentencianan di casonan cu a sosode na otro paisnan den Antiyas Hulandes.

NO TIN PERSECUSION POLITICO

Fiscal a bisa Hues cu e persecucion contra e personanan aki ta solamente pasobra nan a haci algo contra ley. No tin nada di persecucion politico. El a bisa cu Ministerio Publico y Landsrecherche a haci nan investigacion intachabel.

GRUPO PRIVILEGIA PA HAYA TERENO

El a bisa cu e sistema di erfpacht na Aruba ta hopi tranca. Por dura años promer cu un hende por haya reaccion pa un tereno. Via DIP mester haci peticion.



Sin embargo un grupo chikito ta haya loke nan kier via Sevinger. Sevinger tabata firma e peticionnan y manda pa DIP. Ta hopi miyones di florin e grupito a gana sin haci mucho gasto.

PONE BESLAG RIBA 2.4 MIYON FLORIN DI SUSEBEEK

Fiscal a muestra cu Susebeek a haya erfpacht y algun dia despues a bende esaki pa 1.4 Miyon Dollar y pone esaki riba un cuenta bancario den exterior. A pone beslag riba esaki.

GRUPITO A GANA HOPI PLACA

Fiscal a muestra cu Mansur di e proyecto Lisner a haya 1.3 miyon dollar. Werleman casi 1 miyon dollar y Nuñez 800 mil dollar di e proyecto Damira. Lisner y Damira a wordo cumpra door di e grupo Donadi pa 3.5 miyon dollar. Arends cu e proyectonan Deshaun NV y Elenath NV a haya 750 mil florin. E sospechosonan aki ta laga muestra cu lo bay haci un proyecto y ta haya erfpacht y despues ta bende esaki pa hopi placa. Fiscal a bisa cu Harms y Biemans realmente a realisa nan proyecto. Pero

otro nan no. Landsrecherche a logra descubri esaki. Abath y Every a yuda Sevinger. Sevinger a malversa 11 mil florin di Fundacion Curazon Berde pa paga pasashi pa su señora viaha hunto cu Sevinger.

BIEMANS LIBER DI TUR ACUSACION

Fiscal a bisa Hues cu e ta pidi pa declara Biemans liber di tur acusacion. E ta haya cu Biemans doño di Bucuti a pidi expansion di erfpacht pa traha un cushina nobo. No tin nada irregular a sosode aki. Por a mira Biemans a bisa sumamente contento.

CASTIGONAN EXIGI

Despues di a exigi 5 año di prison y 10 año sin por postula como politico contra Benny Sevinger, Fiscal a sigui cu Susebeek. Fiscal ta haya cu Susebeek tabata scondi tras di diferente compania, mientras cu e tabata dicidi tur cos. E ta haya cu Susebeek a cumpra Sevinger y a laba placa. Fiscal a exigi 4 año di prison, kitando e 34 dianan cu e tabata sera y cu e 2.4 miyon florin lo keda confisca.

Despues Hues a sigui cu Arends. E ta haya cu Arends tabata e cabez tras di e dos proyectonan y a gana 750 mil florin. Fiscal a exigi 3 año di prison, kitando e 46 dianan cu e tabata sera. Ademá Fiscal a exigi un boet di 25 mil florin.

Fiscal ta haya Nuñez, Werleman y Mansur culpabel. El a muestra cu durante investigacion di caso Avestruz, Mansur a bula bay Merca pasobra e no tabata kier bay sera. Fiscal a exigi 2 año di prison pa cada un y 25 mil florin di boet pa cada un.

Fiscal a pidi Hues pa declara

Abath liber di e acusacion di a wordo cumpra pa Biemans. Pa e otro casonan di pasamento di tereno e ta haya cu Abath a yuda Sevinger. El a exigi 6 luna di prison, kitando e tempo cu e tabata sera.


Fiscal a pidi pa declara Winterdaal culpabel pero no ta duna castigo.

Fiscal a exigi pa Richardson, castigo igual na loke e tabata sera y 2 luna di prison condicional y 2 año di prueba.

Fiscal a exigi pa Every, castigo igual na e 18 dianan cu e tabata sera. Tambe a exigi 160 ora di trabao pa comunidad.

Otro luna 12,13,14,15 y 16 December, abogadonan tin oportunidad di presenta nan defensa y Fiscal tin oportunidad di reacciona. Despues e abogadonan por bolbe reacciona y tur sospechoso tin chens pa expresa nan mes. Despues Hues lo sera tratamiento di e caso y lo fiha un fecha pa sentencia cual lo bay ta otro año.

Invitacion pa Misa di Sanacion na honor di Señor de Los Milagros Dialuna 14 di November



Pastoor Jairo Maduro y Pader Jose Miquel hunto cu Debotonan di Señor de Los Milagros, ta invita cordialmente tur debotonan di Señor de Los Milagros, barío di Santa Cruz, imigrantenan pa un misa di sanacion pa enfermonan cu Santísimo, y cu interseccion poderoso di La Birgen Maria Dolorosa, dialuna 14 di november pa 7.00 or anochi na Parokia Inmaculada Concepcion na Sta Cruz, cas di e Replika di Señor de los Milagros. Pa **6.15 pm** nos ta cuminsa resa Rosario di Señor de Los Milagros. Koor cu lo compaña e anochi aki lo ta Koor Carismatica.

Hesus y Su Mama ta warda bo.

AVISO

E tereno di oracion na Koyari ta sera pa publico y pa tur actividadnan, te na un otro aviso.

Propletario di dicho tereno: Seferino Tromp